

31. januar 2016

UPA 2016/68

Inatsisartut suleriaasiat § 33 immikkoortoq 1 naapertorlugu matumuuna inatsisartunut aalajangiiffigisassatut siunnersuut imaattoq saqqummiuppara.

Inatsisip atuutsinneqartup Naalackersuisut kingusinnerpaamik UPA 2017-imi allangortinnissaanut siunnersuummik suliniuteqaqqullugit siunnersuut. Taamaaliornikkut ilagiit sinniisaannut qinikkatut sulineq allatulli qinigaaffittut atuutilerseqqullugu.

(Inatsisartunut ilaasortaq Anthon Frederiksen, Partii Naleraq).

Tungavilersuut:

Ilagiit sinniisaanni sulinerup inuusunnerusunit kajumigineqarnerulernissaa siunertaralugu aamma ilagiit sinniisaanni ilaasortat ilarpassuisa kissaateqarnerat naapertorlugu siunnersuut inatsisartuni aaliangiiffigisassatut siunnersuutingaara.

Ilagiit sinniisaanni sullissineq naluneqanngitsutut ukiorpassuarni eqqartorneqartuarpoq, minnerunngitsumik ilagiit sinniisaannut qinigaasartut qinikkatut allatuulli isigineqartanninnerat pissutigalugu.

Naluneqanngilaq ilagiit sinniisaannut qinersisarnerni inuusuttut qinigassanngortittunut ilaasaraluartut, kisiannili amerlanertigut qinigaareernerup kingorna paasineqaraangat, ilagiit sinniisaanni qinikkat, qinikkatulli allatut atugassaqartinneqarneq ajortut, qinigaasaraluartut tunuaannartariaqartarsimapput aamma qinikkatut allatuulli aaliangersimasumik qaammammut qinigaanersiutinik pissarsisoqarneq ajormat.

Ilagiit sinniisaanni qinikkat ilaasa oqaloqatigisarneranni paasinarpoq, ilagiinni sullissineq arlalitsigut naleqqussarneqartariaqalersimasoq aamma inatsiseqarnerup tungaatigut.

Ilageeqarnek nunatsinni inuiattut ineriartornitsinni pingaaruteqartutut inissisimavoq. Aamma ulluinnarni inuunitsinnut assigiinngitsorpassuarnik nuannersunik nuanniitsunilu atugaqartarnitsinni immitsinnut timikkut anersaakkullu nukittorsaqatigiiffittut atortarparput.

Qujanartaqaaq palasit, ajoqit, ilagiit sinniisaat, pattattut allallu ilagiinni sulisut suliaminnut tunniusimalluinnarlutik inuiaqatigiinni suleqataammata.

Taamaammat ilagiinni sullissisut sapinngisamik pitsaasunik atugassaqartinneqarnissaat inatsiseqarnikkut qulakkiissallugu pisariaqarlunilu pingaaruteqarluinnartoq Partii Naleqqamiit isumaqarpugut.

Ilagiit sinniisaasa namminneq piumassutsiminnit sulisutut Naalakkersuisuniit taajorneqarunnaarlutillu isigineqarunnaassasut siunnersuutikkut anguniarneqartut ilagaat, tassami ilagiit sinniisaat Inatsisartut inatsisaat nr. 7 3. december 2012-meersoq toqqammavigalugu qinigaasarput.

Taamaammat taakkua kommunalbestyrelsini ilaasortatuulli aammalu nunaqarfinni siulersuisutuulli atorfeqarnerat isigineqartariaqarpoq. Taamaammat siunnersuutigaarput Naalakkersuisut siunnersuuterput pimoortissagaat allannguutissatullu siunnersuut ilagiit sinniisaat susassaqtullu qanimut suleqatigalugit suliarissangaat.

Innuttaasunut siunnersuutip aningaasatigut allaffissornikkullu kingunerisassai:

Innuttaasunut kinguneqassanngilaq. Ilagiit sinniisaannut ilaasortanut akissarsiat pillugit isumaqatigiissusiorsimasunut ilagiit sinniisaanni qinikkatut sulineq qinigaaffittut allatut isigineqalissappat akissarsiaqarluni sulinngiffeqarnissamut periarfissat annertusarneqassapput.

Namminersortunut siunnersuutip aningaasatigut allaffissornikkullu kingunerisassai:

Namminersortunut kinguneqaratarsinnaavoq, namminersortup sulisorisaa akissarsiat pillugit isumaqatigiissusiorsimappat taannalu ilagiit sinniisaannut qinnigaasimappat. Sulisorineqartoq qinigaaffimmut atatillugu amerlanertigut akissarsiaqarluni sulinngiffeqarsinnaanermut pisinnaatitaaffeqassammat. Taamaalilluni sulisitsisoq qinigaasimasup aningaasarsiassaanut tiiminut qinigaaffimmut atorneqartunut aningaasartuuteqassaaq.

Pisortatigut siunnersuutip aningaasaqarnikkut allaffissornikkullu kingunerisassai:

Naatsorsuutigineqarpoq inatsimmik allannguissamik siunnersuummik suliaqarnissaq AC fuldmægtigip aningaasarsiaasa ½ pallillugit, tassa 500.000 kr.-it aningaasartuutaassasut.

Ilagiit sinniisaanni sulineq qinikkatut sulinertut isigineqalissappat pisortani sulisuusut ullut 60-it tikillugit akissarsiaqarlutik sulingiffeqarsinnaanermut pisinnaatitaaffealissapput, takuuk qinikkatut pisortanillu toqqakkatut suliaqarneq pillugu nalunaarut atuuttoq¹.

Assersuutigalugu ilagiit sinniisaanni qinikkat 2/3-ii akissarsiat pillugit isumaqatigiissusiorsimappata ullumikkullu 275-it nuna tamakkerlugu ilagiit sinniisaanni ilaasortaallutik², taava taakkunannga inuit 183-it suliffimmi nalinginnaasumi akissarsiat pillugit isumaqatigiissusiorsimassasut ilimagineqarsinnaavoq. Ilagiit sinniisaat ukiumut minnerpaamik marloriarlutik ataatsimiisinnegartassapput aammattaaq ilaasortat kissaataat naapertorlugu ataatsimeeqattaarsinnaallutik, takuuk § 17 immikkoortoq 2 ilageeqarnermut inatsimmi³. Ukiumut agguaqatigiisillugu arfinileriarluni akunnernik marlunnik sivilissusilimmik ataatsimiittaraanni ukiumut akunnerit 2196-it suliffiusut missaaniipput, taakkulu sulisitsisup akiligassarai.

¹ Namminersornerullutik Oqartussat Qinikkatut Pisortanillu Toqqakkatut suliaqarneq pillugu nalunaarutaat nr. 5, 15. marts 1994-imeersoq

² Kalaallit nunaanni ilagiit quppersagaat <http://www.ilagiit.gl/> takuuk

³ Ilageeqarneq pillugu Inatsisartut inatsisaat nr. 9 19. maj 2010-meersoq

